



ХЭНТИЙ АЙМАГ
ИРГЭДИЙН ТӨЛӨӨЛӨГЧДИЙН ХУРЛЫН
ХОЁРДУГААР ХУРАЛДААНЫ ТОГТООЛ

2020 оны 12 сарын 03 өдөр

Дугаар 05

Чингис хот

Хэнтий аймгийг 2021-2025 онд хөгжүүлэх
таван жилийн үндсэн чиглэл батлах тухай

Монгол Улсын Засаг захиргаа нутаг дэвсгэрийн нэгж, түүний удирдлагын тухай хуулийн 25 дугаар зүйлийн 25.1, 25.2 дахь хэсэг, Хөгжлийн бодлого, төлөвлөлт, түүний удирдлагын тухай хуулийн 9 дүгээр зүйлийн 9.11.1 дэх заалт, 15 дугаар зүйлийн 15.2 дахь хэсгийг тус тус үндэслэн аймгийн иргэдийн Төлөөлөгчдийн Хурлын Хоёрдугаар Хуралдаанаас ТОГТООХ НЬ:

1. Хэнтий аймгийг 2021-2025 онд хөгжүүлэх таван жилийн үндсэн чиглэлийг хавсралтаар баталсугай.

2. Хэнтий аймгийг 2021-2025 онд хөгжүүлэх таван жилийн үндсэн чиглэлийн хэрэгжилтийг ханган ажиллахыг аймгийн Засаг дарга /Ц.Идэрбат/-д үүрэг болгосугай.

3. Хэнтий аймгийг 2021-2025 онд хөгжүүлэх таван жилийн үндсэн чиглэлийн хэрэгжилтэд хяналт тавьж ажиллахыг аймгийн иргэдийн Төлөөлөгчдийн Хурлын бодлогын хороодод үүрэг болгосугай.

ДАРГА



Г.ХЭРЛЭНЧУЛУУН

Аймгийн иргэдийн Төлөөлөгчдийн Хурлын
2020 оны 12 дугаар сарын 03 -ны өдрийн
Хоёрдугаар хуралдааны 25 дугаар
тогтоолын хавсралт

ХЭНТИЙ АЙМГИЙГ 2021-2025 ОНД ХӨГЖҮҮЛЭХ ТАВАН ЖИЛИЙН ҮНДСЭН ЧИГЛЭЛ

НЭГ. ҮНДЭСНИЙ НЭГДМЭЛ ҮНЭТ ЗҮЙЛ

Зорилго

Үндэсний нэгдмэл бахархлыг сэргээж, эх хэл, түүх, өв соёлоо дээдэлсэн эх оронч үзэл, эв нэгдлийг эрхэмлэсэн Монгол хүнийг хөгжүүлж, нийгмийг соён гэгээрүүлнэ.

Зорилт 1 /Үндэсний бахархал, эв нэгдэл/

1.1.1. Үндэсний бахархал, Монгол өв соёлыг өвлүүлэх, үндэсний дархлаа бий болгох, хүүхэд залууст Цэрэг-эх оронч үзэл хүмүүжил төлөвшүүлэн Монголчуудын уламжлалт төрт ёсоо дээдлэх үзлийг дэлгэрүүлнэ.

Зорилт 2 /Нүүдлийн соёл иргэншилт Монгол/

1.2.1. Өв соёл, зан заншлаа дээдэлсэн, бүтээлч, оюунлаг, үндэсний соёлын мэдлэг, чадвар, дадалтай иргэнийг төлөвшүүлж, монгол өв соёлыг түгээн дэлгэрүүлэх арга хэмжээг хэрэгжүүлнэ.

Зорилт 3 /Монгол хэл, бичиг/

1.3.1. Бүх шатны сургалтын байгууллагад Монгол хэл, бичгийн боловсролыг суралцагчдад чанартай эзэмшүүлж, хүн бүрийн эх хэлний боловсролыг дээшлүүлнэ.

1.3.2. Монгол хэл, бичгийг нийтийн болон албан хэргийн түвшинд зөв хэрэглэж хэвшүүлнэ.

Зорилт 4 / Дэлхийн Монгол/

1.4.1. Орон нутгийн түвшинд үндэсний соёл, урлаг, зан заншил, ахуй, спорт, хоол хүнс судлалыг хөгжүүлэх арга хэмжээг хэрэгжүүлнэ.

ХОЁР. ХҮНИЙ ХӨГЖИЛ

Зорилго

Эрдэм мэдлэгтэй, эрүүл чийрэг, нийгмийн идэвхтэй, хүнлэг, ёс суртахуунтай, дэлхийд үнэлэгдэх Монгол хүнийг төлөвшүүлж, гэр бүлд ээлтэй хүний хөгжлийн бодлогыг хэрэгжүүлнэ.

Зорилт 1 /Боловсрол/

2.1.1. 5 настай хүүхдийг сургуулийн өмнөх боловсролд заавал хамруулж, сургуульд бэлтгэгдсэн байдлыг хангана.

2.1.2. Багшийн мэргэжлийн ур чадварыг тасралтгүй дээшлүүлэн, хөдөлмөрийн бүтээмжид суурилсан үнэлэмжийг хэрэгжүүлж, нийгмийн баталгааг хангана.

2.1.3. Сургууль, цэцэрлэг, дотуур байрын хүчин чадал, ашиглалт, бүтэц, хэв шинж, байршлыг оновчтой тогтооно.

Зорилт 2 /Эрүүл мэнд/

2.2.1. Халдварт болон халдварт бус өвчнөөс сэргийлэх, хянах, эрт илрүүлэлтийг эрчимжүүлж, нийгмийн эрүүл мэндийн онцгой байдлын хариу арга хэмжээ, бэлэн байдлыг бэхжүүлнэ.

2.2.2. Хүн амын эрүүл мэндийн мэдлэг боловсролыг дээшлүүлж, нийгмийн эрүүл мэндийн тусламж үйлчилгээг эрчимжүүлэх замаар иргэдийн урьдчилан сэргийлэх, эрт илрүүлэх үзлэг, оношилгоо шинжилгээнд хамрагдалтыг нэмэгдүүлж, сэргийлж болох нас баралтын түвшинг бууруулна.

2.2.3. Яаралтай тусламжийн чанар, хүртээмж, чадавхыг сайжруулж, эрүүл мэндийн байгууллагын барилгын асуудлыг шийдвэрлэж, нэн шаардлагатай тоног, төхөөрөмж, авто машины парк шинэчлэлийг хийнэ.

2.2.4. Эрүүл мэндийн салбарт цахим үйлчилгээг өргөжүүлэн эрүүл мэндийн мэдээллийн сан бүрдэж, өдөр тутмын оношилгоо, үйлчилгээнд алсын зайн технологийг бүрэн нэвтрүүлнэ.

2.2.5. Орон нутагт эмийн бодлогыг хэрэгжүүлж, антибиотикийн хяналтыг сайжруулна.

2.2.6. Эрүүл мэндийн салбарын хүний нөөцийн ур чадвар, нийгмийн хамгааллыг сайжруулна.

Зорилт 3 /Гэр бүл/

2.3.1. Хүүхдийн хөгжил, авьяас, ур чадвар, техник сэтгэлгээ, төлөвшлийг дэмжихэд эцэг, эх, олон нийтийн оролцоог нэмэгдүүлж, хүүхэд хамгааллыг сайжруулна.

2.3.2. Хөгжлийн бэрхшээлтэй хүн, ахмад настанд ээлтэй, хүртээмжтэй орчин нөхцөлийг бүрдүүлж, хөдөлмөр эрхлэх боломжоор хангана.

2.3.3. Хүүхдийн эрхийг дээдлэн, аливаа хэлбэрийн хүчирхийлэл, сэтгэл зүйн дарамт, хөдөлмөрийн мөлжлөгөөс ангид байлгаж эрсдэлээс урьдчилан сэргийлнэ.

Зорилт 4 / Хүнд ээлтэй амьдрах орчин/

2.4.1. Хүнсний бүтээгдэхүүний аюулгүйн үзүүлэлтийг тодорхойлох чадвартай болж, хүнсний аюулгүй байдал хангагдана.

2.4.2. Орон сууц, ногоон байгууламжийн стандартыг сайжруулна.

2.4.3. Агаар, ус, хөрсний бохирдол болон дуу чимээг багасгаж, цэвэр, ногоон байгууламж бүхий орчныг нэмэгдүүлнэ.

2.4.4. Хот суурины үерийн далан суваг, борооны болон хөрсний ус зайлуулах шугам сүлжээний ажлыг үе шаттайгаар хэрэгжүүлнэ.

Зорилт 5 /Хөдөлмөрийн зах зээл /

2.5.1. Хөдөлмөр эрхлэлийн түвшинг 5-аас дээш хувиар нэмэгдүүлнэ.

2.5.2. Албан бус хөдөлмөр эрхлэлтийн бүртгэл, мэдээллийг сайжруулна.

ГУРАВ. АМЬДРАЛЫН ЧАНАР БА ДУНДАЖ ДАВХАРГА

Зорилго

Нийгмийн хамгааллын үйлчилгээг зорилтот бүлгэд чиглүүлэн, Хөдөлмөр эрхлэлтийг дэмжиж, өрхийн орлогыг нэмэгдүүлэн, хүн амыг орон сууцаар хангана.

Зорилт 1

3.1.1. Халамжийн үйлчилгээг хүн амын бүлгүүдийн ялгаатай хэрэгцээ, нийгмийн хөгжлийн хэрэгцээ, шаардлагад нийцүүлэн ил, тод нээлттэй, чирэгдэлгүй болно.

Зорилт 2 /Орлогод нийцсэн орон байр/

3.2.1. Нийгмийн даатгал төлдөг бага, дунд орлоготой иргэдийг анх удаа орон сууц худалдан авахад нь орон сууцны хөнгөлөлттэй зээлд хамруулж дэмжинэ.

3.2.2. Дотооддоо үйлдвэрлэсэн барилгын зарим үндсэн нэр төрлийн хямд материалаар барьсан бага өртөгтэй орон сууцаар хангана.

Зорилт 3 /Хөдөлмөр эрхлэлт ба гарааны бизнес/

3.3.1. Залуучуудад бизнес эрхлэх зорилгодоо хүрэхэд шаардлагатай дэмжлэг, туслалцааг үзүүлж, орчин, нөхцөлийг бүрдүүлнэ.

3.3.2. Малчид, тариаланчдыг бизнесийн тогтвортой орлогын эх үүсвэртэй болгоно.

3.3.3. Аялал жуулчлалын бүтээгдэхүүн, үйлчилгээ, чанар стандартыг сайжруулж, өрсөлдөх чадварыг дээшлүүлэн, иргэд, аж ахуйн нэгжийн орлогыг нэмэгдүүлнэ.

3.3.4. Хоршоологчдыг дэмжих арга хэмжээг шат дараатай хэрэгжүүлнэ.

Зорилт 4 / Эрүүл, идэвхтэй амьдралын хэв маяг/

3.4.1. Хүн амд үзүүлэх биеийн тамир, спортын үйлчилгээний хүртээмжийг нэмэгдүүлнэ.

3.4.2. Иргэдэд үйлчлэх спортын зориулалтын стандарт цогцолбор, талбайг нэмэгдүүлнэ.

3.4.3. Нийтийн биеийн тамирыг эрүүл, идэвхтэй амьдралын хэв маяг, аж төрөх ёсны салшгүй хэсэг болгон хөгжүүлнэ.

ДӨРӨВ. ЭДИЙН ЗАСАГ

Зорилго 4.

Эдийн засгийн тогтвортой өсөлтийг хангаж, ядуурал буурсан, хүнсний бүтээгдэхүүн, ахуйн хэрэглээний бүтээгдэхүүний дотоодын хэрэгцээг өөрсдөө хангадаг, экспортыг нэмэгдүүлсэн, хөрөнгө оруулалт, хуримтлалын чадавхаа дээшлүүлсэн аймаг болно.


Зорилт 1 /Чадварлаг Хэнтийчүүд/

4.1.1. Төсвийн хөрөнгийг эдийн засаг, нийгмийн хөгжилд чиглүүлсэн, үр ашигтай, хариуцлагатай төсөв, санхүүгийн бодлого баримтална.

4.1.2. Дотоодын нийт бүтээгдэхүүнийг жил бүр тогтвортой өсгөж, ажил эрхлэлтийг нэмэгдүүлнэ.

4.1.3. Төсөл хөтөлбөрийн хөрөнгө оруулалт, гадаадын шууд хөрөнгө оруулалтыг нэмэгдүүлж, төр, хувийн хэвшлийн түншлэлийн хүрээнд орон нутгийн бизнес эрхлэгчдийг чадавхжуулна.

4.1.4. Төрийн худалдан авах ажиллагаагаар дамжуулан дотоодын үйлдвэрлэлийн бүтээгдэхүүний худалдан авалтыг дэмжиж, тогтвортой нэмэгдүүлнэ.



Зорилт 2 /Эдийн засгийн чиглэл/

4.2.1. Хөдөө аж ахуйн бүтээгдэхүүний боловсруулалтын түвшинг өсгөж, малын гаралтай бүтээгдэхүүний үйлдвэрүүдийг барьж, экспортыг нэмэгдүүлнэ.

4.2.2. Аймгийн онцлог бүхий аялал жуулчлалыг хөгжүүлж, аялал жуулчлалын шинэ бүтээгдэхүүн бий болгох замаар олон улсын аялал жуулчлалын зах зээлээс жуулчид татаж, зорин ирэх жуулчдын тоог өсгөнө.

4.2.3. Эдийн засгийн хөгжлийг дэмжсэн эрчим хүч, инженерийн дэд бүтцийг нэмэгдүүлнэ.

4.2.4. Жоншны баяжмал, шууд ангижруулсан төмрийн үйлдвэрийн бүтээн байгуулалтыг эхлүүлж, ашиглалтад оруулах, түүнд шаардлагатай дэд бүтэц болох авто зам, ус, эрчим хүчний төслүүдийг Бор-Өндөр, Дархан сум, Бэрх тосгоныг түшиглэж хэрэгжүүлнэ.

4.2.5. Цахилгаан дамжуулах агаарын шугам, дэд станцыг барьж, цахилгаан эрчим хүчний хангалтыг өсгөнө.

4.2.6. Зүүн бүсийн логистикийн төвийг төр, хувийн хэвшлийн түншлэлээр байгуулна.

4.2.7. Улаанбаатар-аймаг-сум хоорондын нислэгийн чиглэл, тоог нэмэгдүүлнэ.

4.2.8. Түүхэн аялал жуулчлалын бүс нутгийн сумд руу авто зам барина.

Зорилт 3 /Санхүүгийн систем/

4.3.1. Бичил санхүүгийн байгууллагуудыг чадавхжуулан эрсдэлийн удирдлагыг сайжруулж, үйл ажиллагааг идэвхжүүлнэ.

4.3.2. Мөнгө угаах болон терроризмыг санхүүжүүлэхтэй тэмцэх ажиллагааг орон нутагт хэрэгжүүлнэ.

4.3.3. Банкны салбаруудын орон нутгийн байгууллагуудын уялдааг хангаж, иргэдэд найдвартай, шуурхай, хөнгөлөлттэй үйлчилгээ үзүүлэх нөхцөлийг сайжруулна.

Зорилт 4 /Бүс нутгийн хамтын ажиллагаа/

4.4.1. Оросын Холбооны Улс, Бүгд Найрамдах Хятад Ард Улс болон гуравдагч орнуудтай худалдаа, нийгэм, эдийн засгийн харилцааг өргөжүүлж, экспортыг дэмжих, арга хэмжээ авна.

Зорилт 5 /Хэнтийн брэнд бүтээгдэхүүн/

4.5.1. Жижиг дунд үйлдвэрлэлийг хөгжүүлж, шинэ санаа, оюуны бүтээл, дэвшилтэт техник, технологид тулгуурлан Хэнтийд үйлдвэрлэсэн эрүүл чанартай бүтээгдэхүүний Брендийг бий болгон, гадаад дотоодын зах зээл дэх борлуулалтын сувгийг тэлнэ.

ТАВ. ЗАСАГЛАЛ

Зорилго

"E Mongolia" төсөлд тулгуурлан иргэн, хуулийн этгээдэд төрийн үйлчилгээг шуурхай, чирэгдэлгүй хүргэсэн, төрийн албан хаагчийн мэдлэг, чадвар, сахилга, хариуцлагыг сайжруулж иргэн төвтэй төрийн үйлчилгээтэй аймаг болно.

Зорилт 1 / Цахим Монгол/

5.1.1. "E Mongolia" болон "Erg.e-mongolia" системийг аймгийн хэмжээнд үе шат дараатайгаар нэвтрүүлж төрийн үйлчилгээг шуурхай, чирэгдэлгүй хүргэж, ил тод байдлыг хангана.

Зорилт 2 / Чадварлаг, ёс зүйтэй төрийн алба/

5.2.1. "Иргэн төвтэй төрийн үйлчилгээ" арга хэмжээг хэрэгжүүлэх замаар төрийн үйлчилгээний чанар, төрийн албан хаагчийн мэдлэг, чадвар, ёс зүй, сахилга, хариуцлагыг сайжруулна.

ЗУРГАА. НОГООН ХӨГЖИЛ

Зорилго

Хүрээлэн байгаа орчны бохирдол, доройтлыг бууруулах, байгалийн баялгийг зүй зохистой ашиглах, нөхөн сэргээх, байгальд ээлтэй дэвшилтэт ногоон технологи нэвтрүүлж уур амьсгалын өөрчлөлтийг сааруулах, дасан зохицох бодлогыг хэрэгжүүлж хүн амын эрүүл, аюулгүй орчинд амьдрах эрхийг хангана.

Зорилт 1 /Эх байгаль экосистем/

6.1.1. Тусгай хамгаалалттай газар нутгийн сүлжээг өргөтгөж, цэнгэг усны нөөц, гол мөрний урсац бүрэлдэх эхийг улсын тусгай хамгаалалтад авах ажлыг эрчимжүүлнэ.

Зорилт 2 /Байгалийн баялгийн өгөөж/

6.2.1. Хөрсний үржил шим, чийгийг хамгаалж, газрын доройтол, хөрсний бохирдол, цөлжилтөөс сэргийлэн, эвдрэлд орсон, доройтсон газрыг нөхөн сэргээж, аж ахуйн эргэлтэд оруулна.

6.2.2. Нэн ховор, ховор амьтан, ургамлын нөөц, ховордсон зүйлийг хамгаалж, нөхөн сэргээж, ашиглалтад өртөмтгий амьтан, ургамлыг зориудаар үржүүлэн тарималжуулж ашиглалтын нөөц бий болгоно.

6.2.3. Ойгоор бүрхэгдсэн талбайн хэмжээг нэмэгдүүлнэ.

Зорилт 3 /Ус үнэт баялаг/

6.3.1. Усан сан бүхий газрын хамгаалалтын бүс, ус хангамжийн эх үүсвэрийн эрүүл ахуйн бүсийн дэглэмийн хэрэгжилтийг сайжруулж, усны бохирдол, хомсдолыг бууруулна.

6.3.2. Газрын байгалийн тогтоц, голын татамд хур тунадас, хайлсан цас, мөсний усыг хуримтлуулах хөв цөөрөм, далд усан сангууд байгуулна.

6.3.3 Саарал усны технологийг ахуйн хэрэглээнд нэвтрүүлэх нөхцөлийг бүрдүүлж, эхлүүлнэ.

Зорилт 4

6.4.1. Ус, цаг уурын ажиглалтын болон орчны хяналт-шинжилгээний сүлжээг өргөжүүлж, цаг агаарын аюулт үзэгдлийг урьдчилан мэдээлэх, сэрэмжлүүлэх чадавхыг бэхжүүлж байгалийн гамшгийн эрсдэлийг бууруулна.

6.4.2. Аймгийн хэмжээнд ногоон худалдан авалтыг нэмэгдүүлнэ.

6.4.3. Аймгийн болон сумын төвүүдийн хог хаягдлын асуудлыг шийдэж, хог дахин боловсруулах үйлдвэрийг барьж эхлүүлнэ.

6.4.4. Гэр хорооллын өрхүүдэд шахмал түлшний хэрэглээг нэвтрүүлэх замаар хариуцлагатай, хэмнэлттэй хэрэглээг бий болгож, агаарын бохирдлыг бууруулан иргэдийн эрүүл, аюулгүй орчинд амьдрах нөхцөлийг хангана.

ДОЛОО. АМАР ТАЙВАН, АЮУЛГҮЙ НИЙГЭМ

Зорилго

Орон нутаг дахь батлан хамгаалах чадавхыг бэхжүүлж, хүний эрх, эрх чөлөө, нийгмийн дэг журам, иргэдийн амьдрах орчны аюулгүй байдлыг хангах, гамшгийн эрсдэлийг бууруулах замаар хүн, нийгмийн аюулгүй байдлыг хангана.

Зорилт 1 /Зэвсэгт хүчин, гамшгийн эрсдлийг бууруулах/

7.1.1. Мэргэжлийн чадварлаг Зэвсэгт хүчнийг хөгжүүлж, алба хаагчдын амьдрах нөхцөл шинэчлэгдэж, хугацаат цэргийн алба хаагч иргэдийн хувийг нэмэгдүүлнэ.

7.1.2. Орон нутгийн хамгаалалтын тогтолцоог бэхжүүлж, дайчилгааны төлөвлөлтийг хэрэгжүүлнэ.

7.1.3. Гамшгийн техник хэрэгсэл, туулах чадвартай автомашин хангалтыг нэмэгдүүлнэ.

7.1.4. Гамшгийн аюулын үед харилцан ажиллах дадлага, сургуулилтыг нэмэгдүүлэх, иргэдэд гамшиг аюулт үзэгдлээс урьдчилан сэргийлэх мэдээ мэдээллийг шуурхай хүргэх нөхцөлийг бүрдүүлнэ.

Зорилт 2 /Хүн, нийгмийн амар тайван байдал/

7.2.1. Архидан согтуурахтай хийх тэмцлийг эрчимжүүлж, архинд донтох эмгэгтэй хүнд үзүүлэх эмчилгээ, үйлчилгээний үндэсний чадавхыг бэхжүүлж, архидан согтуурахтай тэмцэх сангийн үр өгөөжийг нэмэгдүүлж “Архидалтгүй Хэтийн Хэнтий” арга хэмжээг зохион байгуулна.

7.2.2. Иргэд гэр бүлдээ амар тайван, аюулгүй амьдрах орчин нөхцөлийг олгох, гэр бүлийн хүчирхийллийг бууруулах, хүүхдийн аюулгүй амьдрах орчныг бүрдүүлнэ.

Зорилт 3 /Хууль сахиулах салбарын хөгжил/

7.3.1. Дэвшилтэт технологи бүхий камержуулалтыг нэмэгдүүлж, төв магистрал зам дагуу тээврийн хэрэгслийн бүртгэлжилт хурдны дундаж тодорхойлох хяналтын камер байрлуулан нэгдсэн системд холбож, гэмт хэрэг, зөрчлөөс урьдчилан сэргийлэх нөхцөлийг сайжруулна.

7.3.2. Шүүхийн шинжилгээний байгууллагын ажиллах нөхцөлийг сайжруулж, чадавхыг дээшлүүлэн, шаардлагатай тоног төхөөрөмжөөр хангана.

7.3.3. Мал хулгайлах гэмт хэргийг бууруулна.

НАЙМ. БҮС, ОРОН НУТГИЙН ХӨГЖИЛ

Зорилго

Хүн амын нутагшилт, суурьшлын тогтвортой тогтолцоотой, байгалийн унаган төрх, экосистемийн тэнцвэрт байдлыг хадгалан хойч үедээ өвлүүлсэн, эдийн засгийн төрөлжилт, дагналт, хоршилт бүхий ногоон үйлдвэрлэл, үйлчилгээг хөгжүүлж, өрсөлдөх чадвартай, харьцангуй тэнцвэртэйгээр бүсийн тулгуур төвийн стандартаар хөгжүүлнэ.

Зорилт 1 /Дэд бүтэц/

8.1.1. Байгаль орчинд ээлтэй, эрэлтэд нийцсэн, тогтвортой, хүртээмжтэй, аюулгүй тээврийн үйлчилгээг хөгжүүлж, авто замын сүлжээг өргөтгөнө.

8.1.2. Орон нутгийн болон цаг агаарын урьтаж анхааруулах мэдээг малчдад дамжуулж бэлэн байдалд оруулах, мэдээлэл холбооны эргэх холбоо бүхий системийг аймгийн төв болон сумдад үе шаттайгаар байгуулна.

8.1.3. Орон нутгийн нисэх буудлын хүчин чадлыг сайжруулж, үйл ажиллагааг өргөжүүлж, агаарын тээврийн үйлчилгээг жигдрүүлнэ.

8.1.4. Аялал жуулчлал, хөдөө аж ахуй, үйлдвэрлэл төвлөрсөн зарим сумдын төвүүдэд чиглэсэн хөрөнгө оруулалтын хэмжээг нэмэгдүүлж, давуу талд тулгуурлан бүсчилж хөгжүүлнэ.

8.1.5. Хот хоорондын болон орон нутгийн нийтийн тээвэр, шуудан үйлчилгээний хүрээг тэлж, чанар хүртээмжийг сайжруулж, иргэдийн тав тухтай үйлчлүүлэх нөхцөлийг бүрдүүлнэ.

8.1.6. Шилэн кабелийн сүлжээг өргөтгөж, интернэт, IPTV хэрэглэгчдийн тоог нэмэгдүүлнэ.

8.1.7. Аймгийн хэмжээнд хаягжуулалт, газар зүйн нэрийн тодруулгын ажлыг хэрэгжүүлж, мэдээллийн нэгдсэн санг бий болгоно.

8.1.8. Бүсийн аймгуудын үйлдвэрлэл эрхлэгчдийн уялдаа холбоог хангаж, хамтын ажиллагааг дэмжинэ.

Зорилт 2 /Аялал жуулчлал/

8.2.1. Аялал жуулчлалын бүтээгдэхүүн, үйлчилгээ, чанар, стандартыг сайжруулж, өрсөлдөх чадварыг дээшлүүлэн жуулчдын тоог нэмэгдүүлнэ.

8.2.2. "Мянганы суут хүн Чингис хаан цогцолбор" байгуулж, Монголын нууц товчооны дурсгалт газруудыг хамгаалах, олон улсад сурталчлан таниулах, дэд бүтцээр /автозам, эрчим хүч, инженерийн шугам сүлжээ/ холбох ажлуудыг үе шаттай зохион байгуулж, түүхэн аялал жуулчлалыг хөгжүүлнэ.

8.2.3. Тогтвортой аялал жуулчлалыг хөгжүүлэх төслийг Хэнтий аймагт хэрэгжүүлж, иргэн, аж ахуйн нэгж, байгууллагын орлогыг нэмэгдүүлнэ.

8.2.4. Орон нутгийн онцлогт тохируулан аялагч, амрагч, жуулчдыг татах төрөлжсөн аялал жуулчлалын бүтээгдэхүүнийг шинээр бий болгож, хөгжүүлнэ.

Зорилт 3 /Тогтвортой хөдөө аж ахуй/

8.3.1. Гол нэрийн хүнсний бүтээгдэхүүний хэрэгцээг дотоодын үйлдвэрлэлээр хангана.

8.3.2. Аймгийн махны үйлдвэрүүдийн үйл ажиллагааг дэмжиж, махны экспортын хэмжээг нэмэгдүүлнэ.

8.3.3. Бэлчээрийг усжуулах, худагжуулах ажлыг үргэлжлүүлэн малын бэлчээрийн нөөцийг нэмэгдүүлж, тогтвортой байдлыг хангана.

8.3.4. Малын чанар, ашиг шим, үүлдэр угсааг сайжруулж, малын тоог чанарт шилжүүлж, малын генийн санг хамгаалж, биотехнологийн ололтыг нэвтрүүлэх замаар эрчимжсэн мал аж ахуйн салбарыг идэвхжүүлнэ.

8.3.5. Мал, амьтны эрүүл мэндийг хамгаалах, мал, амьтны гаралтай түүхий эд, бүтээгдэхүүний ариун цэвэр, эрүүл ахуйн шаардлагыг хангаж, малаас хүнд дамжих халдварт болон гоц халдварт өвчнөөс нийтийн эрүүл мэндийг хамгаална.

8.3.6. Тариалангийн нийт эргэлтийн талбайн ашиглалтыг сайжруулж, голлох нэр төрлийн таримлаар дотоодын хэрэгцээг хангаж, бусад ашигт таримлын үйлдвэрлэлийг нэмэгдүүлнэ.

8.3.7. Мал, малын гаралтай түүхий эдийг боловсруулах үйлдвэр байгуулж, ажлын байрыг нэмэгдүүлж, малчдын орлогыг өсгөж, хөдөө аж ахуйн гаралтай бараа, бүтээгдэхүүний экспортыг нэмэгдүүлнэ.

8.3.8. Жижиг, дунд үйлдвэр, бизнес эрхлэгчдэд зориулан санхүүжилтийн шинэ боломжийг нэвтрүүлж, оновчтой хуваарилж, бизнес инкубатор төвөөр бойжуулж, жижиг, дунд үйлдвэр эрхлэгчдийн ур чадварыг хөгжүүлэн, өрсөлдөх чадварыг дээшлүүлж, орлогыг нэмэгдүүлнэ.

8.3.9. Усалгаатай тариалангийн талбайг нэмэгдүүлэх замаар тэжээл, төмс, хүнсний ногооны тариалангийн үйлдвэрлэлийг өсгөнө.

..... * *